

Служба обща
исповеднику Российскому 20-го века единому

Вечер

На Господи воззвах: стихиры, глас 1.

Подобен: Прехвальнии мученицы:

Прехвальне исповедниче (*имярек*),/ ты во дни гонений на Церковь Российскую/ не убоялся еси мучителей безбожных/ и, веру Христову исповедав,/ страдания претерпел еси,/ свидетельства же ради истины/ благодатию Божиею хранимь был еси/ и в мире почил еси./ Темже ныне, наслаждаяся радости Небесная,/ моли спастися душам нашим.

Исповедниче (*имярек*) доблий,/ ты в годину безбожия во отечестве нашем,/ яко истинный воин Христов,/ любовь к Богу распалаемь,/ веру православную исповедал еси/ и, узы темничныя и работы горькия/ в сладость духовную восприем,/ во уповании тверд пребыл еси./ Темже ныне, наслаждаяся радости Небесная,/ моли спастися душам нашим.

Исповедниче мудре (*имярек*),/ ты, во дни испытания веры в земли нашей/ Христу с любовью последуя,/ страданием вольным и исповеданием твердым/ образ верным показался еси/ и, немощныя в вере укрепив,/ утешение людем православным/ и учитель благочестия явился еси./ Темже ныне, наслаждаяся радости Небесная,/ моли спастися душам нашим.

Слава, глас 8:

Исповедниче славне (*имярек*),/ ты на Бога все упование возложил еси/ и Той тя прослави во Царствии Небеснем,/ идеже со сродники нашими,/ новомученики и исповедники Российскими,/ верою, надеждою и любовью Ему угодившими,/ прославляеши Отца и Сына и Святаго Духа/ Троицу Единосущную и Нераздельную.

И ныне, Богородичен: Царь Небесный:

Вход. Прокимен дне.

Чтения три преподобническая.

На стиховне стихиры, глас 4.

Подобен: Яко добля:

Яко благий раб и верный,/ вверенный ти талант благочестия/ исповеданием Христа преумножил еси,/ темже в радость Господа вшел еси/ и, велие дерзновение от Него восприем,/ молишися о земли нашей/ и о верою чтущих память твою.

Стих: Бог мой еси Ты,/ и исповемся Тебе.

Егда прииде Господь испытати люди Своя,/ блаженна ты раба и бдяща обрете,/ исповедниче (*имярек*) всечестне,/ не ктому раба, но друга нарече тя,/ и, яко вернаго стража дому Своего/ над многими ты постави/ и дарова молитвенника тепла о душах наших.

Стих: Отверзите мне врата правды,/ вшед в ня, исповемся Господеви.

Поминая слово Господне:/ несть раб болий господя своего,/ аще

Мене изгнаша и вас ижденут,/ гонения и страдания за Христа любве ради претерпел еси./ Темже, блаженства изгнанных правды ради сподобився,/ любве совершенныя достигл еси,/ исповедниче доблий *(имярек)*.

Слава, глас 6:

Приидите, вси вернии,/ достойно воспоим *(имярек)* славнаго,/ сей бо, подвиг страдания и исповедничества совершив/ и последи благочестно пожив,/ Богу в мире душу предал еси/ и от сущих зде к вечным жилищем преставился еси,/ идеже молится о душах наших.

И ныне, Богородичен: Творец и Избавитель:

Тропарь, глас 4:

Страдания за Христа претерпев,/ веру Православную сохранил еси/ и, терпением гонители Церкви Русския посрамив,/ благочестно в законе Господни пожил еси,/ исповедниче славне *(имярек)*,/ престолу Божию предстоя,/ моли спастися душам нашим.

На утрени

На Бог Господь: тропарь тойже.

По 1-м стихословии седален, глас 4:

К Богу Вышнему воззвал еси,/ исповедниче досточудне *(имярек)*:/ помилуй мя, Господи,/ яко врази нечестивии попраша мя/ и избави душу мою от смерти,/ очи от слез и нозе от поползновения,/ да благоугожду пред Тобою во свете живых.

Слава, и ныне, Богородичен:

Стена непобедимая людем православным еси, Богородице Дево, / к Тебе бо притекающе, невредими пребываем,/ и паки согрешающе, имамы Тя Молитвенницу./ Тем, благодаряще, вопием Ти:/ Радуйся, Благодатная, Господь с Тобою.

По 2-м стихословии седален, глас 4:

Егда неправеднии оболгаша тя и князи людстии ранам жестоким предаша,/ ты, исповедниче *(имярек)*, на Бога уповая, молился еси:/ Господи, Господи, кто подобен Тебе,/ исповемся Тебе в сердце моем,/ и язык мой поучится правде Твоей, весь день хвале Твоей.

Слава, и ныне, Богородичен:

О, Всепетая Богородице Владычице, мучеников исповедание и венче, / Ангелы славимая и человеки воспеваемая,/ и всего мира возжеленная Помощнице,/ избави Церковь Русскую всякаго обстояния,/ Едина Благословенная.

Величание:

Величаем тя,/ исповедниче святой *(имярек)*,/ и чтим святую память твою,/ ты бо молиши за нас/ Христа, Бога нашего.

Псалом избранный:

Исповемся Тебе, Господи, всем сердцем моим о милости Твоей и истине Твоей.

Господь Помощник мой, на Него упова сердце мое, и исповемся

Ему.

Глаголах о свидениях Твоих пред цари, и не стыдяся.

Исповемся имени Твоему, Господи, яко благо, яко от всякия печали избавил мя еси.

На Бога уповах, не убоюся, что сотворит мне человек.

Изведи из темницы душу мою, исповедатися имени Твоему.

Поношения поносящих Ти нападоша на мя.

От бездн земли паки возвел мя еси, ибо аз исповемся Тебе в людех, Господи.

Веселитесь, праведнии, о Господе, и исповедайте память святыни Его.

Да исповедятся Тебе, Господи, вся дела Твоя.

По полиелеи седален, глас 4:

Бога ревностне исповедуя, славне *(имярек)*,/ страдания от безбожных нивчтоже вменил еси,/ темже даровася ти благодать даже до конца благочестне пожити./ Ныне же, во Царствии Божии наслаждаяся жизни вечныя,/ моли спастися душам нашим.

Слава, и ныне, Богородичен:

Недвижимое утверждение веры/ и спасение душ наших,/ Богородицу песньми величаим, вернии:/ радуйся, Православия Ограждение,/ радуйся, земли Русския Покрове,/ радуйся, Невесто Невестная.

Степенна, 1-й антифон 4-го гласа.

Прокимен, глас 4: Бог мой еси Ты,/ и исповемся Тебе.

Стих: Исповемся Тебе, яко услышал мя еси, и был еси мне во спасение.

Всякое дыхание: Евангелие Луки, зачало 64.

По 50-м псалме стихира, глас 6:

Егда в гонении болезни смертныя одержаша тя,/ исповедниче Христов *(имярек)*,/ веры православныя не отступил еси/ и Бога ревностне прославлял еси,/ Иже и воздаде ти венец правды,/ яко поборнику необориму.

Канон, егоже краегранесие кроме Богородичнов осми песен:

Крепость моя и пение мое Господь. Глас 5.

Песнь 1

Ирмос: *Коня и всадника в море Чермное,/ сокрушаяй брани мышцею высокою,/ Христос истрясе,/ Израиля же спасе,/ победную песнь поюща.*

Крестною силою укрепляемь,/ изгнания многолетняя претерпел еси,/ глад и хлад, яко дар Божий восприем./ Темже, *(имярек)*, исповедник славный явился еси.

Русския Церкви сын верный быв,/ поругания, насмеяния и лжесвидетельства испытал еси/ и безбожники словом безмолвным обличил еси,/ страдальче изрядный, *(имярек)*.

Во исповедание истины, яко в броню крепкую, облеклся еси, *(имярек)*,/ и, воин Христов непобедимый явлься,/ словом, яко мечем

обоюдоострым, враги Божия посрамил еси.

Богородичен: Разрешися клятва, печаль преста,/ Благословенная бо и Благодатная Отроковица верным Радость пороуди,/ Христа, Бога нашего.

Песнь 3

Ирмос: Водрузивый на ничесомже землю повелением Твоим,/ и повесивый неодолимо тяготеющую,/ на недвижимем, Христе, камени заповедей Твоих,/ Церковь Твою утверди, / едине, Блаже и Человеколюбче.

Праведных души в руке Божией,/ и не прикоснется их мука,/ сими словеса укрепляемь, *(имярек)* крепкодушне,/ телесная страдания мужественно претерпел еси/ и образ исповедания веры сыновом русским явил еси.

Оградився силою крестною, *(имярек)*,/ страдания и изгнания от безбожных претерпел еси/ и, веру непорочно сохранив,/ в мире благочестне пожил еси./ Сего ради и венец правды от Христа Подвигоположника приял еси.

Смутися земля Русская,/ яко опустоши ю беззаконие велие,/ ты же, *(имярек)* великоимените, подвиги исповедничества благоухая,/ яко крин сельный посреде пустыни, процвел еси.

Богородичен: Иже от Отца прежде всех век рождена,/ Ты, Мати Божия, неискусомужно родила еси./ Темже Тя вси, Богородицу, православно исповедуем.

Седален, глас 3:

Ненавидящия Господа посрамил еси,/ иже хотяху тя, исповедниче *(имярек)*, Христа отлучити и смерти предати./ Ты же, к Богу ум твой вперив,/ яко птица, сети ловящих избавился еси/ и в кровы Небесныя возлетел еси,/ идеже, в лице новомучеников и исповедников Российских пребывая,/ молишися о спасении душ наших.

Слава, и ныне, Богородичен:

Кийждо, идеже подвизается, усердно к Тебе притекает, Богородице,/ несть бо иного Прибежища, спасающаго души наша, яко Ты, Всепетая.

Песнь 4

Ирмос: Божественное Твое разумев истощание/ прозорливо Аввакум, Христе, со трепетом вопияше Тебе:/ во спасение людей Твоих/ спасти помазанныя Твоя пришел еси.

Терпением вооружився, потекл еси на подлежащий ти подвиг, исповедниче *(имярек)*,/ и, прещения мучителей не убоаяся,/ непоколебимь пребыл еси, егда смутися Русская земля.

Мал бе в братии твоей, якоже и Давид в роде своем, / обаче избрания Господь, исповедниче *(имярек)* славне, со всеми мученики/ отъяти поношение сынов Церкви Русския.

Облеклся еси первее в светлыя одежды Крещения,/ таже в подвиже исповедания тыя убелил еси, святе,/ темже, вшед в чертог Небесный,/

зриши Лице Света Непреступнаго.

Богородичен: Невместимаго во чреве приемши,/ без болезни родила еси, Всенепорочная Мати,/ и по рождестве Дева Нетленна, пребыла еси.

Песнь 5

Ирмос: *Одеяйся светом, яко ризою,/ к Тебе утреннюю,/ и Тебе зову:/ душу мою просвети, омраченную, Христе,/ яко един Благоутробен.*

Яко сын дне, во свете заповедей Христовых ходил еси, святе *(имярек)*,/ и душу твою подвигом исповедания освятил еси,/ ныне же почести по достоянию от земных приемлещи.

Изведе тя на подвиг Господь,/ егда люди российстии отступиша Церкви Христовы,/ имже, яко светильник веры явился еси,/ темницы смрадные и работы лютыя претерпевая.

Прежде даже не приити дню Господню великому и страшному,/ ношь безбожия бодренным духом просвещал еси,/ дни лукавыя исповеданием Христовым изобличая.

Богородичен: Правду и Избавление нам рождши, Христа, без семени,/ естество праотца от клятвы свободила еси, Богородице.

Песнь 6

Ирмос: *Неистовствующея бурю душеленною, Владыко Христе,/ страстей море укроти,/ и от тли возведи мя,/ яко Благоутробен.*

Егда буря гонений Церковь Русскую одержаше,/ ты, *(имярек)* блаженне, утверждение и помощь от Господа прием,/ волны многомятежныя мужественне прешел еси.

Не уразумеша безбожнии мучители,/ како за Христа страждещи, *(имярек)*,/ и в подвизе твоём Господа исповедуеши./ Сего ради и осудишася.

Исполнися на тебе глагол Христов, аще Мене изгнаша и вас ижденут,/ темже, уготовав душу твою во искушение,/ многая страдания, поношения и скорби претерпел еси.

Богородичен: Исполнися на Тебе пророчество Симеоново/ и оружие пройде душу Твою,/ темже мучеником и исповедником Стена Нерушимая и Помощь присно бываеши, Богомати.

Кондак, глас 2:

Яко звезда новая Церкви Русския явился еси,/ терпеливодушне *(имярек)* исповедниче,/ Христа Бога прославляя/ и в нощи безбожия путь верным указуя./ Темже молим тя:/ моли нам, сродником твоим,/ в вере Православней утвердиться/ и спастися душам нашим.

Икос:

Даждь ми слово, Слове Божий,/ по достоянию восхвалити подвиги добляго *(имярек)*,/ новаго исповедника, в земли Российстей возсиявшаго,/ в страданиях терпеливаго и в благочестии кроткаго,/ Небесным ликом сопричтеннаго,/ идеже ныне Триадиного Бога

воспевает и молит непрестанно/ нам, сродником его,/ в вере Православней утвердиться/ и спастися душам нашим.

Песнь 7

Ирмос: Превозносимый отцев Господь,/ пламень угаси,/ отроки ороси,/ согласно поющыя:/ Боже, благословен еси.

Егда посети Господь землю Русскую многими испытании грех ради наших,/ тогда явил еси твердость в подвизе твоём, *(имярек)* славно,/ исповеданием веры Христовы пламень безбожия угашая.

Мужеством и крепостию душу твою украсив,/ верность Христу в житии твоём сохранил еси/ и, многия скорби претерпев, вечнаго покоя достигл еси,/ идеже прославляеши Бога отец наших.

Отложив страх мучения, к подвигу исповедания мужественно устремился еси, *(имярек)*/, Христа единого возжелев,/ Ему же ныне поеши:/ благословен еси Боже отец наших.

Богородичен: Бога плотию родила еси, Всенепорочная,/ Единого от Троицы,/ Ему же вси поем:/ Боже, благословен еси.

Песнь 8

Ирмос: Тебе Вседетелю,/ в пеци отроцы всемирный лик сплетше, пояху:/ дела всякая, Господа пойте,/ и превозносите во вся веки.

Егоже отроцы в пеци исповедаша,/ Того и ты в пламени страданий пред мучители прослави, научая всех взывати:/ да благословит земля Русская Господа/ и превозносит во вся веки.

Господа исповедайте, яко Благ,/ - поучал еси псаломски, мудре *(имярек)*/, и Той поспешит сыновом русским на спасение,/ Благословенный во веки.

Отца, Сына и Духа Святаго житием твоим исповедал еси, страдальче Христов,/ помози и нам подвигом добрым подвизатися,/ течение жизни совершити и веру непорочну сохранить.

Богородичен: Тя, Богородицу Пречистую,/ паче ума и словесе рождшую Господа и присно девствующую,/ благословим и превозносим во вся веки.

Песнь 9

Ирмос: Исаие, ликуй,/ Дева име во чреве,/ и роди Сына Еммануила,/ Бога же и Человека,/ Восток Имя Ему:/ Егоже, величающе, Деву ублажаем.

Славу во испытаниих единому Богу воздал еси,/ исповедниче Христов приснопамятне,/ сего ради и Той тя/ в лице новомучеников и исповедников Российских прослави.

Проще Церковь наша новомученики и исповедники Российскими,/ не отрину бо Господь люди Своя./ Ты же, исповедниче славный *(имярек)*/, в купе с ними пребывая,/ молиши сохранитися вере Православней в земли нашей.

Оружием благоволения венча тя Господь,/ исповедниче блаженне *(имярек)*/, имже и нам на враги невидимыя споборствуй/ и моли Христа Бога сохранитися вере Православней в земли нашей.

Богородичен: С новомученики и исповедники Российскими, Пречистая, и всеми святыми/ умоли Единого во святых Почивающего/ сохранить землю нашу, славословящую Тя во вся веки.

Светилен:

Светодавец Христос Бог наш, исходы утра и вечера украсивый,/ Света Невечернего ты, исповедниче *(имярек)*, сподоби./ Темже, во светлостех святых пребывая,/ и нас светом незаходимым просвети,/ да, в радости ликующе, прославим Свет нам Показавшаго.

Слава, и ныне, Богородичен:

Дивно и неизреченно Рождество Твое, Богородице,/ Имже спасла еси род человеческий,/ темже молим Тя:/ светом незаходимым нас просвети,/ да, в радости ликующе, прославим Свет нам Показавшаго.

На хвалитех стихиры, глас 6.

Подобен: Все отложше:

Благодатию свыше облеченный,/ исповедниче всечестне, *(имярек)*,/ яко истинный раб Христов,/ в вере православней непоколебимь пребыл еси/ и, гонителей благословляя, глагола еси:/ аще и истяжете тело мое,/ душу не возможете разлучити от любви Божия,/ яже о Христе Иисусе Господе нашем,/ на Негоже единого уповаю/ и Ему единому возношу хвалу.

Древним исповедником подобяся,/ исповедниче мужественный *(имярек)*,/ в годину гонений на Церковь Русскую/ сердцем веровал еси право,/ усты же Христа исповедал еси во спасение,/ и, раны нивчтоже вменив,/ о срамоте поношения небрегл еси./ Темже, безбожных посрамив мучителей,/ блаженство в дому Господни улучил еси,/ идеже во веки веков Его восхваляеши.

Воспоим, боголюбивии людие,/ песнями и пении духовными/ святую память *(имярек)* достохвальнаго,/ иже, Православие добропобедным гласом/ не боязненно пред мучители исповеда/ и многим путь спасения показа./ Темже радуются ныне Ангельстии чини/ и сликовствуют святии земли нашея,/ с ними же и исповедник славный/ прославляет Христа Бога нашего.

Слава, глас 8:

Славою и честью нетленною,/ яко подвижника добропобедна,/ венча ты Христос Подвигоположник,/ исповедниче Христов *(имярек)*,/ и Царствие Небесное дарова,/ идеже, с собором новомучеников и исповедников Российских/ в неприступном свете пребывая,/ прославляеши Троицу Живоначальную и Нераздельную.

И ныне, Богородичен:

Срадуются с нами умная вся Чиноначалия,/ духовный совокупльше лик,/ видяще Царицу и Владычицу всех,/ многоименне верными славиму,/ радуются же и души праведных,/ сущии зрители видения,/ на воздухе молебно простирающе всечестней Свои руке,/ просящу умирения миру/ и земли Русской утверждения,/ и спасения душ наших.

Славословие великое и отпуст.

На Литургии

Блаженна от канона, песни 3-я и 6-я. Прокимен, глас 7: Исповемся Тебе, Господи,/ всем сердцем моим. Стих: Аще пойду посреде скорби, живиши мя. Апостол ко Ефесеим, зачало 233. Аллилуиа, глас 2: Праведнии исповедятся имени Твоему, и вселятся правии с лицом Твоим. Стих: Господи, Господи, Сило спасения моего, осени еси над главою моею в день брани. Евангелие Матфея, зачало 38. Причастен: В память вечную будет праведник:

Молитва

О, преславный и добропобедный исповедниче Христов (*имярек*), Церкви Русския украшение, земли нашея красный плоде, сродников твоих похвало и образе!

Ты, не убоясь мучителява прещения, веру православную небаязненно исповедал еси и, болезни и страдания мужественне с любовью ко Христу претерпев, вратами правды в Небесное Царство вшел еси. Темже молим тя: вознеси ныне теплую молитву твою ко Господу о Отечестве нашем, да утвердит его в вере Православней до скончания века, нас же, чтущих память твою, да укрепит спасительныя заповеди Его соблюдать, да, избавльшися от греха и вечныя муки, вкупе с тобою сподобимся воспевати достопокланяемое имя Отца и Сына и Святаго Духа во веки веков. Аминь.